

Mid-Day Dogri News Bulletin, 09th December 2024

समे — 12:25

<><><><><><>

PM-Bima Sakhi

प्रधानमंत्री नरेन्द्र मोदी होर अज्ज हरियाणा दे पानीपत च एलआईसी दी बीमा सखी योजना दी शुरूआत करडन ते महाराणा प्रताप हॉटीकल्वर युनिवर्सिटी दे मुख कैंपस दा नीह पत्थर बी रक्खडन। 495 कमांह जिमीं च फैले दे मुख परिसर ते 6 इलाकाई शोध स्टेशन दे निर्माण पर 700 करोड़ रपे थमां मती दी लागत औग। इस युनिवर्सिटी च ग्रैजुएट ते पोस्ट-ग्रैजुएट शोध लेई बागवानी दा इक कॉलेज ते बागवानी पर आधारित 10 विशे दी पढ़ाई लेई 5 स्कूल होडन। तोआई बीमा सखी योजना दा मकसद महिलाएं च माली साक्षरता ते बीमा जागरूकता गी बढ़ावा देना ऐ। भारत दी जीवन बीमा निगम— एलआईसी दी एह पैहल 18 थमां 70एं ब'रें दिएं 10मीं पास महिलाएं गी सशक्त बनाने आस्तै शुरू कीती गई ऐ। उनें'गी खास सिखलाई ते पैहले त्रऊं ब'रें आस्तै भत्ता राशि दित्ती जाहग। इस मौके पर मोदी होर संभावित बीमा सखिएं गी नियुक्ति प्रमाण पत्र बी बंडडन।

<><><><><><>

Parliament Session

इक प्रमुख कारोबारी समूह खलाफ कथित गुज्जखोरी दे आरोपे गी लेइयै बरोधी धड़े पास्सेआ कीते गेदे हंगामे ते बरोध प्रदर्शन दे चलदे संसद दे दौनें सदनें दी कारवाई गी दपैहरी 2 बजे तगर स्थगित करी दित्ता गेआ ऐ। एहदे शा पैहले अज्ज बडलै जिसलै लोकसभा दी बैठक लग्गी तां स्पीकर ओम बिरला होरें आखेआ जे प्रश्नकाल मता जरूरी ऐ ते सुआले दे समे दरान कोई बी मामला नेई चुक्केआ जाई सकदा। उनें विरोध प्रदर्शन करने आले सदस्ये गी आखेआ जे ओ सदन दे कम्मे च कोई रुकावट पैदा नेई करन। शोर शराबे दे चलदे स्पीकर होरें सदन गी दपैहरी 12 बजे तगर स्थगित करी दित्ता। उआं राज्यसभा च कम्म बवस्था आले ढंगै कन्नै चला'रदा हा पर उत्थे बी बरोधी धड़े नै हंगामा शुरू करी दित्ता जिस करी सदन दी कारवाई गी 12 बजे तगर स्थगित करी दित्ता गेआ। विपक्षी इंडी ब्लाक दे सांसदे अज्ज संसद भवन परिसर च इक प्रमुख कारोबारी समूह खलाफ कथित तोर पर शिवतखोरी दे आरोपे गी लेइयै परोध प्रदर्शन कीता। कांग्रेस, डीएमके, आरजेडी इस

विरोध प्रदर्शन च शामिल होए। कांग्रेस अध्यक्ष मल्लिकार्जुन खरगे लोकसभा च विपक्ष दे नेता राहुल गांधी, डीएमके नेता टी.आर.बालू, आरजेडी दे नेता मनोज झा ते होरने इस प्रदर्शन च हिस्सा लैता।

<><><><><><>

LG-Education

लेफ्टिनेंट गवर्नर मनोज सिन्हा होरें भारत गी विकसित राष्ट्र बनाने लेई ते अर्थबवस्था दे बक्ख-बक्ख खेत्तरें च पूरे-पराते विकास लेई ज्ञान दे खेत्तर च इक नमीं क्रांति दी जरूरतै पर जोर पाया ऐ। जम्मू युनिवर्सिटी दे जनरल ज़ोरावर सिंह ऑडिटोरियम च महावीर इंटरनेशनल स्कूल दे 18में सलाना समारोह गी संबोधित करदे होई एलजी होरें विद्यार्थिं अंदर छप्पी दी समर्थ गी सामने आहने च अध्यापकें दी भूमिका पर लोऽ पाई। उनें आखेआ जे छड़ा म्तेहानें लेई गै किश नमां सिक्खने दी भावना गी नकारेया जाना चाईदा ऐ ते नौजवान पीढ़ी गी नैतिक मुल्लें-कदरें दे कन्नै जीवन दे बक्ख-बक्ख पैटलुएं बारै बड़ी संजीदगी कन्नै जानकार बनाया जाना लोडचदा ऐ। एलजी होरें आखेआ जे बच्चें गी पढ़ांदे बेल्ले अध्यापकें गी छड़ा पाठ्यक्रम दे दायरे अंदर गै सीमित नेई होना चाईदा सगुआं उनें गी अपना ज्ञान ते तजुर्बे बी विद्यार्थिं कन्नै सांझे करने लोडचदे न। उनें आधुनिक शिक्षा प्रणाली च आर्टिफीशियल इंटेलीजेंस दे महत्वै पर बी लोऽ पाई। उनें आखेआ जे आर्टिफीशियल इंटेलीजेंस आहली तकनीक गी अध्यापकें दा विकल्प समझने दे बजाय, अध्यापकें दी मदाद आहला इक जरिया समझेया जाना लोडचदा ऐ। इस मौके पर एलजी होरें बेहतरिन कारकरदगी दस्सने आहले विद्यार्थिं गी सम्मानित बी कीता।

<><><><><><>

Jammu SIH

औंदी 11 दिसम्बर थमां आयोजित कीते जा करदे स्मार्ट इंडिया हैकार्थॉन 2024 दे साफ्टवेयर संस्करण दी मेजबानी लेई आईआईटी जम्मू पूरी चाल्ली तैयार ऐ। मुख्य भरै थमां 30 टीमां, इस दरान साईबर सुरक्षा सरबंधी बड़ी मती महत्वपूर्ण चुनौतिं दा नबेड़ा करने लेई आपूं-चै मुकाबला करडन। आकाशवाणी दे जम्मू संवाददाता दी रिपोर्ट मूजब, आईआईटी जम्मू थमां त्रै टीमां कर्नाटक, दिल्ली ते गुवाहाटी जाइयै अपने-अपने सरबंधत नोडल केन्द्रें च आईआईटी जम्मू दी नुमाइंदगी करडन। इस राष्ट्रव्यापी पैटलकदमी दा एह 7मां संस्करण ऐ जेहदा आयोजन शिक्षा मंत्रालय आसेआ कीता जा करदा ऐ। केन्द्री शिक्षा मंत्री धर्मेन्द्र प्रधान होर

वर्चअल ढंगै कन्नै एहदा उदघाटन करडन। मुख्य भरै च इस कार्यक्रम लेई 51 नोडल केन्द्र बनाए गेदे न।

<><><><><><>

LG-SIA

स्पोर्टस अथार्टी ऑफ इंडिया दे प्रतिनिधिएं इक दल नै कल उपराज्यपाल मनोज सिन्हा हुंदे कन्नै मलाटी कीती। प्रतिनिधिएं दे इस दल च शामिल एकजीक्यूटिव डरैक्टर स्पोर्टस अथार्टी ऑफ इंडिया मंजूश्री दयानंद ते डिप्टी डरैक्टर डॉ. संगीता शियोरन होरें उपराज्यपाल हुंदे कन्नै केन्द्र सरकार दिएं खेड्डें सरबंधी स्कीमें गी लागू करने लेई प्रमुख मुद्दे उपपर विस्तार कन्नै चर्चा कीती। केन्द्र सरकार बक्ख-बक्ख खेड्ड स्कीमें गी लागू करने लेई बड़े मते जतन करने ताई बड़े मते जतन करा करदी ऐ। इनें स्कीमें च खेलो इंडिया स्टेट सेंटर ऑफ एक्सीलेंस जित्थें रोइंग, खयाकिंग ते कनोसिंग डल झील, श्रीनगर ते तलवारबाजी जम्मू च खेड्डियां जांगन। उपराज्यपाल होरें स्पोर्टस अथार्टी ऑफ इंडिया गी जकीन दुआया जे जम्मू कश्मीर च खेड्डें दे बढावे लेई हर मुमकन मदद दित्ती जाग।

<><><><><><>